

EEFEESUSA

Efeesusa maqusanaasa

Pauroofa akara rumannimaqoo

ufafa.

¹ Qinee Pauroosa Anutuna iriranannai asauku mundirana Yisunaindi maridaqa, mifa diqiqoo fasiqausa maridaqa. Anutuna maqasaa fasiqa anaasee Efeesusa maqusai mariasa asauku mundirana Yisuna ufamau andeeqasee maqee maqee fimariasa inni maa akarana rumanni-maqaidaqa.

² Maasa qikoofa Anutufa faqa maasa karaambaiqa asauku mundirafa Yisufa faqa narí afaarirana faqa narí asooarana faqa inni nimiani.

Pauroofa asauku mundiranaki mariasa innaarunai amiqi amiqirana mararufa.

³ Maasa dufi dufi qirana maasa qikoona Anutuna faqa maasa karaambaiqa Yisuna faqa nimi-aqa. Maasa asauku mundiranaki keeqafufanoo mina akoofa Anutufa amiqi amiqirana maasa Yisuna namufaqa qiminau. Mifa innaarunaindaraa amiqira dadaaqirana qimaqaifanoo miqoo innaarunai maridanoo, minara maasa dufi dufi qimamaqaidaqa.

⁴ Ooqai maa maqa maaqana sia auqu kamuqoo faiqí faqa sia maru kamuqoo Anutufa moomoosa kambiaqa marifandinausa ki-naana maasa rusandeesamumandee marararee qimaqoosa maraqaisa maridaqa. Narí asauku

mundirana Yisunannai maasa maraḡoosa sia aaḡarausa mariaḡeera noori kandamasee andeeḡarausa mariaḡee qimasee maasa rusandeesa-mumasee maraḡoosa maridaḡa.

⁵ Sia faiḡi maru kamuḡoo Anutufa narí aidi-ranannai maasara maaḡimminau, qeeḡa qisauku mundiranannai misa ḡini faiḡi namu ḡiraamuḡ-maakai kammambifaḡa qeeḡa unnannai misa mara ḡuḡaanauree ḡinau. Anutuna aidirafa fuaninnana miḡiminoo maridanoo.

⁶ Anutufa narí kaaḡa ḡara areenara afaari-rana narí amuḡusira amaaku kaḡi nimimari ainainnara foora kaḡi niminau. Minara maasa ḡimuḡusa ookiḡari idaaḡira ainaina uḡannee ḡi-aḡeera kaḡi niminau.

⁷ Anutufa narí asauku mundirana kuḡiranannai maasa mandainainakinaana idukuḡiseenoo maasa mandoosana akiaḡara minniḡisainaga marianaura. Maasa minara irisee Anutuna firaa afaariranara akooḡoo uḡanna marifaḡa ḡafamasee irisee naḡimasee maraanauree minara rufiaida furufaridaḡa.

⁸⁻⁹ Anutufa narí irirana firana faḡa ḡafeemari-ana faḡa maraseenoo minannai ooḡai marararee ḡimaḡoona maraseenoo narí kukeeḡara irirana asauku mundiranannai aiḡama ḡimaḡoo ainaina anoonaikianifeera qimasee mina maa kamuḡoo kooroomasee narí faiḡi namu araamuḡmmaakai kiranara maasa ḡimaḡiminau.

¹⁰ Anutufa narí kai irinoo andeeḡara aukuanee qimasee narí ooḡai kambiaḡaaninna ainainara ḡimarufa taikaannoo minara ḡimarufa maaḡim-miannoo Anutufa aiḡama ainainna auḡuḡoo

ainainafa innaarunai mari ainaina faqa maaqoo mari ainaina faqa oonu maree ani mareegeenoo moodaanaki quqaseenoo asauku mundirafa misa nikiagasaa mariannoo.

¹¹ Anutufa mi aiqama ainainna narí ooqai fuanee qimaqoomau fidanoo miqidanoo. Anutufa narí ooqai fuanee qimaqoomau fidanoo maasa narí aiku asauku mariaqee qimasee faiqí aanaaseeki rusandeesamumandee maasa maranau. Sia kaqi miqinai, asauku mundiranannai kai miina aiku asauku mariafanausa maridaqa. Ooqai indaaru oosana aroo aukuanna mi irirana maraqoomau fidanoo asauku mundiranannai maasa maraidanoo.

¹² Maasa asauku mundirana irirana naaree indaaru irisee minara afeesimariasa maasa Anutuna kaaqa areenaranara dufi dufi qidaqa.

¹³ Innee Efeesusa maqannaasa faqa miqikai iqa mariafanoo. Amiqira fasaasa ufa innaaruna asumu marirana nimi maria ufana innee iriseeqa kuqaa anoonufee qufanoo Anutufa narí naaquqara maraquna nimiani qimasoofo inni niminoo minannai nariara utaaqanau.

¹⁴ Anutuna maraquna nimirafa Anutufa innaarunai qimianinna ainainnara qima afeekaikamma utaaqamaqoofa maridanoo, mifa Anutufa kuqaa mandainaina akiaqara rumbaranakinaana idukirana qimiannoo fee qimarifa maridanoo, maasa minara irisee Anutuna kuqaa areenaranara dufi dufi qidaqa.

Pauroofa Efeesusa maqannaasara innaaru qidanoo.

15-16 Qinee Pauroosa minara iriseeqa innee Efeesusa maqannaasa Karaambaiqa Yisuna saqarikiranara irisee faiqi aanaaseera Anutuna ufa irimariasara ridaqa dadaaqidaqa minara iriseeqa iriafannaqooqari qinee Pauroosa inniara Anutufinnai dufi dufi qidaqa. Qinee maqee maqee inniara innaaru qidaqa, maasa karaambaiqa asauku mundirana Yisuna kaaqa areenarana akoofa

17 Anutufa nari marauna inni nimiranoo mifa irirana faqa Anutuna oosana faqa koorooman-nimaqainaqa innee minara iriaqeera innaaru qidaqa.

18 Anutufa inni naaramasee nari areenarana afeesiaqee qimarianara innee iriaqee qimasee inniara innaaru qimasaanaqa inni nifu nitikura quandasainaqa areenarana nimianinnana afeesiaqeera innaaru qidaqa. Naaquqara amiqi amiqirafa idaaqirafa moomoo uqanna nari maqasaa fasiqa anaasee innaarunai nimirara qima afeekaikidanoo nimiannoo minauqara faqa inniara iriaqeera innaaru qidaqa.

19-20 Maasaki mina ufasaa irirana rusimariaqooqari Anutuna afeeka fannoo maasaki ainaini marinara faqa innee iriaqeera qinee Pauroosa inniara innaaru qidaqa. Anutufa asauku mundirana kuqiranakinaana uqeerasee innaarunai nari aaqa nari asauku uqannai ooqumaruqoo firaa afeeka faqa maasaki ainainimarifa faqa amana amana kai moodaa firaa afeeka maridanoo.

21 Miqoo innaarunai asauku mundirafa aiqama ainainasaa uriqaramafi rakisidanoo, aiqama

innaarunai uriqararausa faqa faiqí firaasa faqa afeekafaqaasa faqa karaambaiqauqa faqa misauqa faqa urinaaqaramafi rakisidanoo. Mifa aiqama afeeka nuqu faqaasa maa maqa maaqanaki mariasa faqa innaarunai mariasa faqa urinaaqaramafi rakisidanoo.

²² Anutufa aiqama ainaina mareeqeenoo asauku mundirana aramandunnai quqaseenoo mina mareeqeenoo Yisuna ufara suqimariasa nikiqasaa quqasaifanoo aiqama ainaina uriqarara karaambaiqa maridanoo.

²³ Yisuna ufara suqimariasa Yisuna adakara foora maridaqa, aiqamai mariainainafa qumbiqeemarifa narí adakaki Yisuna ufara suqimariasaki firaqoo maridanoo.

2

Ooqai kuqiranaki ubeekoofaqa maqee asumu mariranaki ubeekaqa maridaqa.

¹⁻² Qinee Pauroosa sia Yuda maqannaara qidaqa innee aanaamuru mariasara qidaqa, ooqai inniqa ufa rukiarana faqa aaqarana faqa miqinunna akiaqara kuqiranaki mariusa mariqau, mi aukuanna maa maqa maaqana mandoosanamau kai fimariqau. Anutuna ufa rukiee mariasa maqee rakisi mari afaannafa Anutuna innaaruna meerai marifanoo mina ameemaanai marina, mina ufara eedoo kai qimarusa mariqau.

³ Maasa faqa aiqamausa aanaamuru Anutuna ufa rukiee mariasa naanna ramasee maasa qeeqa faiqí faiqi mandiriranamau fidaqa qeeqa qifaaqa irirana afaariqa kaqi qeeqa manda didiramau

kai fiqiafana. Maasa Yuda maqannaasa aanaa-
muru naanna ramasee qeeqa qifaaqa afaara-
masee mina akiaqara Anutuna aranaqaranaki
firaridaqa.

⁴⁻⁵ Anutufa mina qafamaseenoo maasara
amuqusirana faqa nifauarafa faqa fraatia
marifanoo asauku mundirana saimbaqa maasa
faqa kuqiranakinaana uqeera qiseenoo sia moo
ainaina, Anutuna afaarirafa kai innaaruna
asumu mariranaki quqanniseenoo.

⁶ Anutufa maasa asauku mundirana Yisunasaa
atoarana qafamaseenoo mina namufaqa
kuqiranakinaana uqeeraqiseenoo Yisuna
namufaqa Anutuna innaaruna mariasasaa
rakisi nimaqaaqee qifaqa miqoo rakisirausaikiqa
marianaaura.

⁷ Sia Anutufa fifau miqinai, narí firaa afaari-
rana faqa, maasa asauku mundirana Yisunaki
keeqarana qafamaseenoo narí firaa aidirana
amuqusirana faqa naaru kambiqainausa uqan-
nifiqarara miqinai.

⁸ Sia moo ainainannai Anutufa narí
afaariranannai kai inni innaarunai asumu
mariranaki quqannisaidanoo, innee Yisuna
saqarikiranannai afaaramma nimaqaidanoo.
Inni asumu nimirafa sia innee andeeqasee
fimarianasaafau mundidanoofau, sia innee
amiqira oosana marasaida kadaapiridee
qimarianasaafau mundidanoofau, Anutuna kaqi
nimiranasaa kai innaarunai asumu marirana
maasa qimirana uqeereenoo.

⁹ Sia maasa qeeqa kadaapiriranannai
innaaruna asumu maraanaura minara sia fifau
maasa qeeqa qimooqira ufa mariannoo.

10 Anutufa maasa auqufa maridanoo sia fifau maasa auqinau, maasa asauku mundirana Yisunasaa atooqaranasaaqari andeeqasee nirana marirana mariaqee qimasee maasa auqinau. Doo ooqai mi andeeqara nirana marirana maasara deedaqammaqoofa maridanoo.

Yuda maqannaasa faqa aanaamuru faqa asauku mundiranaki moodaanaki maridaqa.

11 Yuda maqannaasa ooqaindari nariara kai Yuda maqannaasa fainanduqirausa Anutunaindi maridee qimasaida inni aanaamuruara sia maasa fainanduqirausa marunnnanara aqoosai mariasa maridee qimariqau. Misa fifau nari fainanduqiranara qidaqa miqi qimariqau. Innee aanaamuru mariasa innee ooqai mariunara iriaqa.

12 Innee Efeesusa maqusanaasa asauku mundiranasaaqari naaduma nianasaa mariusa mariafanoo, innee aanaamuru Anutufa maqasaaqaraasaki sia rusandeesamumandee nariara maroosa mariafanoo, aanaamuru nianasaa mariusa mariafanoo. Anutufa Yuda maqannaasa faqa moodaanakikira ufa oosana oosana qima afeekaikiranasaa mundaqa mariusa mariafaqa innee aanaamuru sia minaki marusa naaduma nianasaa marusa mariafanoo. Innee Efeesusa maqusanaasa maa maqa maaqanaki maridaqa sia Anutunara faqa moo ainainara faqa irimariqau kaqi furufara kaimmiqaniqau, Anutuna siaisa mariqau.

13 Doo maqee innee asauku mundirana Yisunasaa atooqaana akiaqara inni ooqaindari nianai mariusa maqee Anutufa inni

rarisameeqeenoo adeedi quqeenoo, asauku mundirafa aunirira saqarisaa kuqunannai kai miqinoo.

¹⁴ Anaamuru faqa Yuda maqannaasa faqa namuqaara foora niana niana rakee iqa mariaasa asauku mundirafa nari kai mareeqee moodaanaki quqaseenoo asoarana maasa qiminau. Yuda maqannaasa faqa aanaamuru faqa namuqaakiqa marufanoo qambaana faandamura ititanoo maruna asauku mundirafa nari afaaqannai faandaamura rakee mandoofaqa moodaanaki kiqau.

¹⁵ Mooseena sandufakina oosanoosana ainainara nimaarusirana mifa faandaamurara foora Yuda maqannaasa faqa aanaamuru faqa aiqamaqara rakeemaqoofaqa mariqau. Asauku mundirafa doo mina ruka taikasoofaqa mi atiqanda oonu maree ani maree asauku mundirana faqa moodaanaki kiqa asoaranaki maridaqa.

¹⁶ Asauku mundirafa nari aunirira saqarisaa kuqunannai Yuda maqannaa faqa aanaamuru faqa nariara nariara fidiqaa imaruna aru taikanau, nari aunirira saqarisaa kuqunannai Yuda maqannaa faqa aanaamuru faqa rakimaruna taikaseenoo Yisufa mareeqeenoo mafi moodaanaki quqaseenoo mareeqeenoo Anutuna aanooqirana taikaseenoo nari akoona Anutunaki asoaranaki quqanau.

¹⁷ Miqi marunara asauku mundirafa nari amiqira asoara fasaasa ufa maree qumureenoo innee Anutunasaaqari nianai maria anaamurusa faqa Yuda maqannaa Anutuna aaqa mariaasa faqa

qimanniminau.

¹⁸ Maasa aiqamaqara Yuda maqannaa faqa aanaamuru faqa asauku mundiranannai kai amana maasa moodaa maraqunaki anireeqa maasa qikoona Anutuna afusaa kikiqianauro.

¹⁹ Ooqai innee moo maqannaara foora aanaamuruara foora mariasa mariafanoo doo maqee sia miqiqa mariafanoo innee doo maqee Anutuna aiku asauku mariasa Yuda maqannaasaki moodaa maqannaa kammambi innee mariafanoo.

²⁰ Doo maqee sia Yuda maqannaa kai, innee faqa maqara foora usakafifanoo asauku mundirafa Yisufa nari uqanna faakana miqirafa marinanoo Yisufa niqiqoo fasiqausa faqa Anutuna tamummaqara fasiqauqa faqa maaqa atunara foora marifanoo innee faqa maaqa asaanara foora misasaa faqa Yisunasaa faqa atukaramambiqa mariafanoo.

²¹ Yisufa uqanna faakanara foora maridanoo aiqama maaqa asaana afapita qumarasaifaqa afeekaikiqa mariafanoo karaambaiga naaquqara amaana maqara foora usakaidanoo fimaree aimaree innooqaidanoo.

²² Innee aanaamuru asauku mundirana saqariki mariasa faqa aiqamausa Yisunaki mariasa faqa Anutufa inni qumareeqeenoo maaqara foora usakaseenoo nari maraqunannai mi maqanaki inniki mari maqafa maridanoo.

3

Pauroofa nari aanaamuruki saikiranara qidanoo.

1 Qinee Pauroosa minara iriseeqa inni Efeesusa maqannara Anutufinnai innaaru qidaqa. Qinee inni aanaamuruara qiman-nimunnana akiqara asauku mundirana Yisuna rumbaranara foora Roomma maqannaasa rumbaranaki marunausa maridaqa inniara innaaru qidaqa.

2 Anutufa narí afaariranannai inni aanaamuru dadaaqiaqee qimasee qimunara innee amiqim-mandee minara irimariafanoo.

3-4 Anutufa Yisunara ooqaindari kukeeqanoo marunara maqee aukwana qini kooroomaqi-maqeenoo. Qinee maa pasanaki kaqikaagoo minara inni qimannimiqa, innee mina asaana rumaseeqa iriqa qiniara asauku mundirana kukeeqara irirana amiqimmandee iridanoommifoo qifaranoo.

5 Ooqai narí kukeeqara irirana Anutufa sia kooroo inau, doo maqee narí maraqunannai amiqira niqiqoo fasiqausa faqa tamummaqara fasiqauqasaa faqa qimanniminoo.

6 Mina kukeeqara ufa maaqimminoo mari-danoo. Yuda maqannaasa Anutuna amiqi amiqi-ranaki maridaqa, Yisuna amiqira fasaasa ufa fannoo inni aanaamuru faqa oonu mareeqeenoo Yuda maqannaasa amiqi amiqiranaki quqanni-saidanoo. Innee aanaamuru mariasa maqee Yuda maqannaasa saimbaqa moodaa nifaaqara foora maridaqa asauku mundirana Yisunakiqari Yuda maqannaasa qima afeekaikammaqoofa innee aanaamuru misa saimbaqa minaki marida maree mariafanoo.

7 Anutufa narí afeekannai naakaparana

akoofasaikirana moo qimufaqa qinee minannai Yisuna amiqira fasaasa ufa saikira faiqikiqa maridaqa.

⁸ Qinee Anutuna aiku asauku maqasaa fasiqaki oorudupirausa marunanoo Anutufa sia minara irinoo kaqi mi naakaparana qiminoo diqiqamaqimaqeenoo asauku mundirana, innaarunai nimira amiqi amiqira ainaina moomoo ainaina sia amana asaana rirana amana mi ufanara aanaamuru qimannimiranaki qini quqaqisaifaqa maridaqa.

⁹ Anutuna ooqai kukeeqara irirafa maqee kooroommasee faiqi anaasee amiqimmandee iriaqeeru faqa qini minaki faqa quqaqisaifaqa maridaqa. Anutufa aiqama ainaina auquqoofanoo marufa miqooqari moomoo aukwana nari kukeeqara irirana Yisunara kisaqasaa rafaqafuqoofanoo marinau.

¹⁰ Maqee aukwana kooroo ianifeera qimasee Yisuna ufara suqimariasaa misannai Anutufa nari irirana quandaqaandidanoo uqannifiqaiifaqa qafaidaqa mina amiqi amiqiranara innaarunai ameemaanai mariasa misa uriqararausa faqa rakisirausa faqa maqee uqannifiqaanifeera Yisuna kooroo idanoo.

¹¹ Anutufa nari naaru naaru mariranaki maridanoo mi ainainna auquanauree qimaqoona maqee auqinau, nari asauku mundirana Yisunannai mi ainainna, nari ufara suqimariasakina nari irirana kooroo ianifeera auqinau.

¹² Maasa Yisunasaa atooqa marianannai faqa maasa mina saqarikiranannai faqa sia maasa

nisaurida rufiaanaura, paasoosamasee Anutuna afusaa fuannanara mi eedoo qirafa maasaindi maridanoo.

¹³ Qinee Pauroosa minara irisee inni afeekaika-mandaيدا qimannimidaqa. Qinee Yisuna ufa qimannimunaqa misa minara fifau qini karabusaki quqeeqa. Inni Efeesusa maqannaasa qinee karabusaki marunna aupuraranara iriseeqa sia Yisuna ufa minniseeqa kudoosaapaaqa, innee minara maaqi qiaqa Pauroona karabusaki marirana maasa Efeesusa maqusanaasa amiqimaqi-maqaidanoo fee qimasee asasiaqa.

Innee nariara nariara nimuqusiranaki mari-aqera qidanoo.

¹⁴ Qinee minara iriqa maasa qikoona Anutunara iriseeqa qiqoori saunarafiqa kummara mafi inniara qeeqa qimuqusannoo innaaru qidaqa.

¹⁵ Innaarunai mariasa faqa maqasaa mariasa faqa aiqamatia Anutunasaqaraana nariqa nuqu uqanna maraيداqa.

¹⁶⁻¹⁸ Mi Anutunara inniara innaaru qidaqa, asauku mundirana innee saqarikiranannai mifa anireenoo inni naunduraki maaqakiara foora ani keeqaanifeera. Mifa nari maraqunannai nari areenarana firaanakiqari inni naunduraki afeeka niminaqa mapukusee mariaya. Qinee inniara maaqi qidaqa innaaru qidaqa, innee inneeqa atukara foora faqa faakanara foora faqa nariara nariara nimuqusiranaki mapukusaaqa, innee Efeesusa maqannaasa faqa Anutuna aiku asauku moo maqanna mariasa saimbaqa afeeka marinaqa minannai asauku mundirana inniara

amuqusinoo aidirana firaana iriaqeera innaaru qidaqa. Mifa inniara amuqusinoo aidirana mina kisaagasaa aidirana faqa mina qusa kamu faqa mina meerai sandaaqaira faqa mina meemai farumara foora marirana faqa mina firaatiara iriaqeera qinee innaaru qidaqa.

¹⁹ Eeoo innee mina inniara amuqusirana firaanara iriaqeera innaaru qidaqa, sia amana moo fannoo firaqoo iriannoo, firaafa maridanoo, mina amuqusirana firaafa maridanoo, innee mina amuqusirana firaana iriseeqa Anutuna umbiqarafa innikina umbiqaanifeera inniara innaaru qidaqa.

²⁰ Anutuna afeeka fannoo maasaki saikiranannai naunduraki amiqi amiqirana nimiannoo, mina naunduraki dadaaqirafa maasa sia amana minara iramasee qimianne qianauro sia amana maasa minara irianauro fira aainainatia maridanoo.

²¹ Yisuna ufara suqimariasa nariqa asauku mundiranasaa atooaranannai Anutuna amooqirafa maqee kamuqoo faqa naaru naaru faqa mariani.

4

Maasa Yisuna adaka atiara foora maridaqa.

¹ Qinee Pauroosa karaambaiqa Yisuna ainaini marunnana akiaqara Roomma maqannaa karabusaki maridaqa. Qinee karabusaki maridaqa inniara afeekaikamandee qimannimidaqa. Anutufa inni naaramasoofaqa innee asauku mundirana saqariki maru kamuqooqari inneeqa nirana mariranara

andeedgasee marianifee qimasee inni naarama minaki quqeenoo. Inneeqa marirafa mina amanakai marianifeera qinee qeeqa qimuqusa ookiqari afeekaikamandee qimannimidaqa.

² Sia Anutufa quqaqoo andeedqarana minnisee moomau fuaqa, innee maqee maqee sia urinaaqaraaqa oorudupimasee mariaqa, sia aanooiaqa, ireeda kai pisoopisoomandee mariaqa sia faiqi aanaaseera qusa ufa qimasee aanooiaqa kisaagasaa ireeda kai idaaqammannimaqaqa. Innee faiqi aanaaseera nimuqusinanoo nidimarinaqa mifa kooroo ianifee qimasee narinni narinni dadaaqifanoo mifa kooroo iani.

³ Anutuna maraqauna fannoo inni moodaanaki mara quqasaifaqa mariafanoo innikina asooarafa inni moodaanaki afapita qumaraifaqa mariafanoo innee mina moodaanaki marirana amiqimasee rakisiaqa, rakee iani.

⁴ Maasa Yisuna ufa irimariasa moodaa nifaqara foora maridaqa, Anutuna maraqauna faqa moodaa maridanoo Anutufa moodaa ainainara afeesiranaki inni rarisama quqeenoo.

⁵⁻⁶ Karaambaiqa moodaa kai maridanoo, Yisuna saqarikirafa moodaa kai maridanoo, amaana nammari moodaa Yisuna auqusaa kai rumannimaqarafa maridanoo maasa aiqama maqa maaqakinaasa nikoofa Anutufa moodaa kai maridanoo, aiqamausa karaambaiqa mifa kai maridanoo mifa nari ufara suqimariasa aiqama naunduraki maridanoo aiqamausakiaqa ainainidanoo.

⁷ Asauku mundirafa nimira dadaaqira

afeeka maasa aiqamausa qiminau narí moomoo dadaaqiranakinaana qiminau. Moo dadaaqira afeeka moo fasiqa aminau, moo dadaaqira afeeka moo fasiqa anaasee niminau. Nimisoofaqa minannai Yisuna saika maraaqera niminau.

⁸ Ooqeenaa tamummaqara fasiqa asauku mundirafa dadaaqira afeeka qimianinnanara maaqi qimasee akara rinau.

Mifa rakira karaambaiqara foora maridanoo namuqaa maqusaki ititasee misa narusee faiqí moomoo karabusa rumbasee misa ainaina faqa indaa mamaree nifiqamaree meerai narí maqusai oorureenoo narí maqannaasa qimannimifaqa mina amooqiafanoo ainaina raina niminau.

⁹ Mi tamummaqara fasiqana ufa kooroo irafa Yisunara maaqimminoo maridanoo.

¹⁰ Mifa narí maqusai meerai ooru funara maaqi qidanoo, mifa naaree meemai maqa ameemaanai ooqureenoo miqooqari mifa kai innaaruna maarini aiqama innaaruna maarinni oorureenoo narí marirana narí auqu amana kai marianifeera aiqama atinai narí irirana narí auqu amana kai quqasanau.

¹¹ Mifa kaqi nimira dadaaqira afeeka faiqí anaasee niminau, mi dadaaqira afeekafa ainainirana akoofasaikiaqee qimasee akaqausee niqiqoo fasiqausa akoofasaikirana niminau, akaqausa faiqí anaasee qimannimirana akoofasaikirana niminau, akaqausa aamina maqannaasa qimannirana akoofasaikirana

faqa paatoo saika akoofasaikirana faqa ufasaa rakisirana akoofasaikirana faqa niminau.

¹² Anutufa sia fifaufau mi dadaaqira afeekana niminau, faiqí anaasee Yisuna ufara suqimari-asa Yisuna afaaqara foora afeekaikamasee mari-aqeera mi dadaaqira afeekana oosana oosana maasa qiminoo qinau, innee maa dadaaqira afeekana marasee minannai qini ufara suqimari-asa afeekaikamannisaaqee qinau.

¹³ Maasa miqimamaree fidaqa maasa kasooqaqee moodaanaki kianaura. Anutuna amaakuara irirana faqaa irirana minasaa rusirana faqa miqiananannai mi moodaanaki kirafa amana kambiqaanoo, mikari maasa faiqí firaasa iriranara foora maraauranoo maraseeqa asauku mundirana firaa irirana amana kai ooru mundufuauranoo.

¹⁴ Mikari maasa sia faiqi aanaaqiara foora aiqama oosana oosana amaana ufa iriseeqa munari minari ianaura unna ufa qimaria fasiqausa nári nikaruqira finnai akaqausa aaqaranaki rarisama quqaidaqa maasa misa ufa iriseeqa sia ufaira foora aiqama saqari udammi udammi-anaura.

¹⁵ Maasa sia miqiaqa, maaqiaqa, nariara nariara qimudao qimasee ridaqa minaki maridaqa nariara nariara sia unnufa qiaqa, anoona ufa kai qidaqa maasa miqianannai faiqi aanaaqiara foora asauku mundirana maasa qikiaqa amanakai innooqamaree ooru mundufuanaura.

¹⁶ Asauku mundirafa narí ufa ameemaanai mariasa rakisimarifaqa misa minara maasa

qikiaqa fee qidaqa. Faiqí afaaqa sia moodaa ainaina maridanoo oosana oosana afaaqa ati fannoo aadu aadu ainaina akoofasaikirana moodaanaki ootupamafifanoo moodaa fasiqa maridanoo. Asauku mundirafa maasa qikiaqa marifa maasa rakisimarifaqa maasa faqa miqi kai iqa faiqí afaaqa fooqaana aadu aadu akoofasaikirausa moodaanaki ootupanoo marifaqa maasa qikiaqa Yisunasaa atooqa maridaqa mina afaaqaikiqa maridaqa. Maasaki aiqamausa naadu naadu nariqa saikirana andeeqasee maridaqa sia nariara nariara nikooqaani nariara nariara rinnanannai moodaanaki innooqafinoo amiqimmandee kambiqafi fuannoo.

Asauku mundiranaki mariasa asukunakinaa oosana taikafinoo kaaqa qarafa aniani.

¹⁷ Miqi marianara qinee Pauroosa Karaambaiqa auqusaa inni qimannimidaqa afeekaikamandee kafaa kafaa qimannimidaqa, sia Anutunara aamina maqannaasa naanna raaqa. Misa irirafa fifau faafaumminoo maridanoo. Innee andeeqasee mariaqa.

¹⁸ Misa nitikurakinaa irirafa asukunaki maridanoo Anutufa nimimari marirana sia misa kaqikaqoo maridaqa aanaamuruara foora sia maridaqa, misa kaaqa irirana siaisa furufari mariasa nári qimaqaamau kai fimariasa, minara kai asukunaki maridaqa.

¹⁹ Misa nisaurirana taikarusa maridaqa nári nifaaqa marirana mandoosanai kai ubeekaidaqa oosana oosana nisaurimaria ainainna sia nisauridaqa fanandidaqa kaqi umaridaqa.

²⁰⁻²¹ Innee Eefeesusa maqannaasa miqira mandoosana sia asauku mundirana saaqaraana iri-afanoo, innee minara irisee Yisuna aiku asauku kambiqafufaqa andeeqara irirana faqaasa inni mina anoona ufa inni qimannimiafaqa irimari-afanoo.

²² Minara innee inneeqa ooqeenaa marirana nirana fatika aqusaqa inni ooqeenaa marirafa inniqa mareeqeenoo inniqa manda nikaruqira nidiranaki quqasoofaqa miqoo innee inneeqa kai kuridimariafanoo.

²³ Inni nimuqusaki manda nidira nidimarina faqa nitikura mandirira irimariana faqa taikasee innaarunaindaraana fuka amiqirafa kai mariani.

²⁴ Inni innaarunaindaraa fuka marirafa Anutuna narí miqirafa maridanoo, mina anoona ufaki andeeqasee marirana faqa Anutuna ufa ameemaanai marirana faqa mina amooqirana faqa mi fuka marirafa anoona maridanoo, innee mi marirana kai qamunnara foora afisusee minaki maraqa nuaqa.

²⁵ Doo minara maaqooqari sia unna ufa kafa mariani, taikaani, aiqama narinni narinni anoona ufa kai narí qimami narí qimami qi-aqa, maasa aiqamausa moodaa nifaaqara foora kai marunnaara naríndi naríndi marunnaara unna ufa sia qiaqa anoona ufa kai qiaqa.

²⁶⁻²⁷ Ani aanooirafa kambiqafinoo sia ani rarisameeqee mandainainaki quqaani, anee aanoo qinana doo mi faasaanasaa mi suanina keeqarana namufaqa taikaseena faiqaa sia kisaagasaa aanoida maria, dauni taikaa, Sadannafa minaki keekafinoo mandainaina

uqeeraandoora.

²⁸ Ainaina ummuari mari fasiqafa ummuari-rana taikaani, taikasee quandaki andeeqasee narí ainainamasee narí narana namasee kudi fasiqauqa faqa naida niminaqa naaqa.

²⁹ Sia putaa ainaina afunda ainainara ufa qiaqa, faiqí anaasee pooduqamannimaqaida dadaaqimaria ufana kai qimasaiqaqa misa iriseeqa amiqirana adiafaairana mareefaranoo.

³⁰ Manda ufa qinanoo Anutuna naaquqara maraquna fannoo iriseenoo akooqaanoo. Anutuna maraquna fannoo inni faqa marifa Anutuna akarara foora naríndi fee qidanoo inniki akara rinoo maridanoo. Mi maraquna akarafa maaqi qimasee inniara qima afeekaikidanoo kasooqaqee Anutufa qinanoo Yisufa qumuree inniara qinindi fee qimasee maraannoo.

³¹ Doo maqee aukwana aiqama sukaqara ufa faqa qusufa qimasee darara qirafa faqa naunduraki mari aanooirafa faqa fatika aquaqa. Nariara nariara firaa kari nameera ufasaa niqimari-afa faqa aquraree mariannana faqa sia kafaa mariani naundurakinaa nariara nariara fidiqaa ira irirafa faqa taikaani.

³² Sia miqiaqa, maaqiaqa, nariara nariara ireeda kai nimuqusa reendeenirafa faqa dadaaqirafa faqa mariani, narinni narinni mandainaina minnisaaqa. Maasa oosana oosana ainainannai Anutuna mandaikamma amaqaafanausa marifanoo Anutufa asauku mundiranannai maasa darirana minniqisanau. Doo innee minara iriseeqa mina amana kai doo

inniqa niqoonausa mandaikamma nimaqarana
narí minnisee narí minnisee iaqa.

5

*Anutufa maasara rirana ammeemmeerიაqa
kaaqa qarana maraaqa.*

¹⁻² Innee Efeesusa maqusanaasara Anutuna amuqusira aiku asauku marianara mina ammeemmeerიაqa asauku mundirafa maasara rinoo amuqusinoo narí marirana maasa qimaqa maqasee kuqiranaki quqasoofanoo tatufira aandau suqara fara foora Anutuna aikiambu inau, innee faqa miqi kai iqa asauku mundirafa maasara rirana ameeemmeerida nariara nariara ruaqa. Inni nariara nariara rirafa maqee maqee inniqa marirana rakisinnimaqaani.

³ Innee Anutuna maqasaa aiku asauku marianara inniki faiqí anaasee narí ummuari narí ummuari maria ufana faqa ikairi irirana faqa ainainara faqa aanaaseera faqa kaaqa fanandi mariana faqa sia mi oosanna maraaqa minara ufa qimariafa faqa doo taikaaqa.

⁴ Ikairi putaa ufa faqa furufarira ufa faqa uteeti qimasee naanaindara qimaria ufana faqa aiqama sia andeeqara ufa sia inniki amanaikinoo maridanoo Anutuna maqasaa aiku asauku mari-afanoo. Innee sia miqaa miqaa iaqa, maaqiaga innee maqee maqee Anutunara dufi dufi qirafa kai inniki mariani.

⁵ Innee maa moodaa ainainnara kai amiqim-mandee iriaqa, faiqí anaasee narí ummuari narí ummuari mariasa faqa ikairi faqaasa faqa

kaaqa ainainara rimariasa faqa miqaa qiqanu-asauqa, asauku mundirana ququsaki faqa Anutuna ququsaki faqa sia uqanna kaqikaqoo ma-reefaranoo. Kaaqa ainainara rimaria oosanafa mifa moo unna anutunara innaaru qimaria fara foora mina ufa iri maria fara foora maridanoo.

⁶ Minara moo fannoo mi oosana oosana manda ainainnara aufadamasee ufa qimasee nari furufarira ufannai inni nikaruqimasee mandainainaki fuaqee qinaqa sia uqanna innee mina iriaqa.

⁷ Maqee maqee Anutufa mi manda oosannara kai qaoo qimarifaqa sia irianannai kai Anutuna aanoo qirafa misasaa aqufidanoo. Minara qinee inni qimannimidaqa miqinna fasiqa anaaseesa sia misa faqa mariaqa, nianasaa rufiasee mariaqa. Minara qinee maaqi qimasee qimannimidaqa.

⁸ Ooqai innee Efeesusa maqusanaasa faqa asukunaki mariusa mariafanoo doo maqee karaambaiqa Anutuna faiqi anaasee aiku asauku kamambi mariafanoo kaaqa qarana fooqaasa mariafanoo, doo minara iriseeqa kaaqa qaranaki mariasara foora ida mariaqa.

⁹ Kaaqa qarafa qafuqakinaa ainaina amiqi amiqifanoo kambiqaidanoo Anutuna kaaqa qaranaki mariasa miqi kai iqa kaaqa qaranaki maridaqa misaki amiqirana faqa andeeqarana faqa anoona ufa qirana faqa misaki kambiqaidanoo.

¹⁰ Innee karaambaiqa aidi mari mariranara randasee maraaqa.

¹² Asukunaki mariasa kukeeqaranaki maridaqa oosana oosana manda nisauri maria ainainna maraifaqa maasa misara qisauruanoo qimasee sia misa oosanara kaqikaagoo ufa qianaura.

¹¹ Minara innee furufarira marirana maree mariasara faqa asukunakinaa oosana maree mariasara faqa rufiasee innee nianasaa mariaqa innee misa manda asukuna mareeqee aiqamausa nifusaa kaaqa qara qoo quqasaifaqa mi manda asukunaki mariasa nisaurirana marasee min-nisaaqeera.

¹³ Mi manda ainainausa mareeqee aiqamausa nifusaa kaaqa qara qoo quqasaifanoo mi manda ainainausa oosana uqanna kaaqa kooroomambuannoo.

¹⁴ Aiqama ainaina asukunakinaana mareeqe kaaqa qara qoo aiqamausa nifusaa quqasaifanoo mi ainainausa faqa kaaqa qaranaikiannoo. Minara maasa idi moo maaqi qinoo maridanoo.

Anee faiqee marianafa findi fua.

Kuqiranakiqari findi finanoo

asauku mundirafa suaniara foora anisaa qaani.

¹⁵ Mi ufafa miqinoo marinara innee Eefeesusa maqannaasa inneeqa mariranasaa amiqimmandee rakisiaqa. Sia aamina fasiqara foora mariaqa irirana faqaasara foora mariaqa.

¹⁶ Maa kamuqoo manda marira kamu marinara sia fifau suani afu afeesimarina kaqinni aiqaraani, aiqama faasaanara ainainira faasaanee qiaqa.

¹⁷ Minara innee sia furufariaqa Karaambaiqa inniara fuaqee qinaqa fifandinnanara faqa

auqeefandinnanara faqa ooqai iridanoo innee mi iriranara randasee paqurimandee mi mau afeekaikamandee fidaqa qafaaqa.

18 Innee nammari namasee furufarirana sia maraaqa mifa inni kuridimarifa maridanoo Anutuna maraƣuna fannoo kai inni naakufinoo naundurari qumbiqafinaqa mariaqa.

19 Innee narí qimami narí qimamidaqa Anutunara amooqirafa inni naundurari qumbiqafina maridaqa Dafidina idi faqa amaana idi faqa Anutunara rara idi faqa mi idinannai narí qimami narí qimami qiaqa.

20 Maasa karaambaiqa asaku mundirana Yisuna auqusaa maqee maqee aiqama ainainara maasa qikoona Anutunara dufi dufi qiaqa.

Faiqí aanaaseera qidanoo.

21 Innee asaku mundiranara naaquqee mari-nara nariara nariara ureeqafi maridaqa reen-deena mandee mariaqa.

22 Innee aanaaseeuqa faiqí ninaaqmaaka qimannimidaqa, innee faqa karaambaiqa aramandunnai maridaqara foora inneeqa nifaaqmaaka ufa ameemaanaí miqimandee mariaqa.

23 Asaku mundirafa narí ufara suqimariasa innaaruna asumu nimimarifa maridanoo, misa uriqararafa maridanoo, anaasee nifaaqmaaka miqikai iqa nári ninaaqmaaka uriqara mafi marianara inneeqa nifaaqmaaka nimeemaanaí ureeqaqa mariaqa.

24 Asauku mundirana ufara suqimariasaa eedoo qimasee mina aramandunnai ooqu mari fiidaqa mariandee kai iqa aanaaseeuqa nári nifaaqmaaka aiqama ufa ameemaanai mariaqa.

25 Faiqí inni faqa qimannimidaqa innee aanaaseeuqa nifaaqmaaka inni qimannimidaqa, innee faqa asauku mundirana aanna raafa, Yisufa narí ufara suqimariasaa narí aanaaqara foora misara kaaqa amuqusufanoo misa naaru mariaqeera qimasee narí marirana misara kuqiranaki paasoosamandee quqanau. Innee inneeqa ninaaqmakara miqi kai iqa uriqarara ainainee qimasee nimuqusinaqa ruaqa.

26-27 Fuka anaasee narí afaaqinnai fuanee qimaseenoo afaafa anukamaseenoo amiqira siara qamunna afisumareenoo narí afaafa akumbau fee namuana fee qikairi fee sia marifanoo andeeqa mareenoo narí afaaqinnai fidanoo. Asauku mundirafa narí ufara suqimariasaa fuka anaaseera foora nammariara foora ruma nimaqaseenoo andeeqara amiqiranaki faqa nifaaqa idaaqiranaki faqa mareeqeenoo narinai amiqiranaki quqaani fee qimaseenoo maasa narí ufannai nammariara foora ruma qimaqasaidanoo nariara kai mara quqeenoo, minara Yisufa narí ufara suqimariasaa amuqusufanoo narí marirana misara kuqiranaki quqanau maqi qidaqa.

28 Faiqí nári ninaaqmaakara miqi kai mandee nári nifaaqara foora nimuqusiani, narí aanaaqara uriqarara ainainee qimasee amuqusimariafa narí kai nariara faqa uriqarara ainainee qidanoo amuqusidanoo.

29-30 Sia moo fannoo narí afaaqara akooqaidanoo amiqimmandee rakisidanoo narana amidanoo asauku mundirafa Yisufa narí ufa suqimariasara narí afaaqafee qimaseenoo rakisidanoo, innee faqa miqikai iqa inneeqa ninaaqmaakara qini qifaaqa fee qimasee amiqimasee rakisiaqa.

³¹ Ooqeenaa tamummaqara fasiqauqa akara mina maaqimminoo maridanoo, Anutufa qunara faiqí moo fannoo narí anoofa akoona minniseenoo narí aanaaqasaa atooqafinoo miqanda moodaa kara mafifaranoo.

³² Mi ufana maa ainainnara kikiqusidanoo anoona amiqirafa maridanoo asauku mundirafa faqa narí ufara suqimariasara faqa faiqí narí aanaaqara faqara foora inoo maridanoo moodaa kara mafuannoo.

³³ Mi ufana inni faiqiara faqa qidanoo aiqama fasiqa nári ninaaqmaakara nári nifaaqara foora nári nimuqusiani, anaasee faqa nári nifaaqmaaka ufa ameemaanai eedoo qimasee mariaqa.

6

Faiqiuqaindiara faqa nári ninaukoora faqa qidanoo.

¹ Faiqiuqaindi inniara qidaqa, inneeqa ninausa nikausa ufara eedoo kai qiaqa. Innee Yisuna ufara suqimariasaki marianara andeeqarafa mifa maridanoo.

² Mooseena sandufara innee irimariafanoo minakinaafa aaquqira ufa qisaukuqara taikasee maridanoo. Minakinaana moo sandufa maasa mi

mau fuanoo Anutufa moo ainaina maaqoo maa maqanasaa maasa qimirara qima afeekaikam-maqoofa maaqimminoo maridanoo, inniqa ninausa nikausara naaquqaina misa ufamau fuaqa.

³ Fifanoo Anutufa inniara kisaacaqasaa inneeqa maqa maaqaki maridaqa amiqiranaki mariaqee qimasee maasara qimafeekaikinau. Maasa mi ufanara uriqarara ufee qidaqa. Doo innee faiqiuaindi mi mau fuaqa.

⁴ Faiqi nikausamara inni qimannimidaqa sia inneeqa faiqi fifau nirana fundakifaqa aanoo iaqa, sia miqiaqa, maaqiaqa, Yisuna ufamau inni faiqiuqa andeeqee andeeqasaifaqa Yisuna ufasaa innooqaqa.

Ainainimariasara faqa misa uriqararaura faqa misara qidanoo.

⁵ Qinee Pauroosa innee moosa ainainimariasaa qimannimidaqa. Inneeqa feefauru marara saikaki keeqafinaqa amiqimasee mina ainainammaisaaqa. Sia nifaaqa quqasee mana mana iaqa. Innee naaquqee marinaqa ainaina akoona anainammaisaaqa, innee asauku mundirana ainainidee qidaqa maqasaa ainaina akoona amiqimasee nimuqusannai ainainammaisaaqa.

⁶ Sia misa eedoo qira ufara kai irisee misa nifusaa kai ainainiaqa, inneeqa nimuqusannai Anutuna ufamau asauku mundirana ainainidara foora amiqimasee ainainamannaqaqa.

⁷ Sia fifau faiqi ainainamaiseera fooriaqa, karaambaiqa ainainammidee qimasee amiqimasee ainainamaisaa.

⁸ Innee miqidaqa maanara iriaqa, Karaambaiqa aiqama fasiqa amana amana kai nimidanoo moosa rumbara saikaki mariasee narí ainainira saikaki mariasee narí amiqira ainainirana akiqara amana amana kai innaarunai nimiannoo.

⁹ Qinee ainainimariasara innee inneeqa ainaina akoona amiqimasee ainainammaisaa qee qimaseeqa innee ainaina akausa faqa qimannimidaqa innee faqa miqikai mandee inniqa ainainimariasasaa amiqimmandee rakisiaqa, amiqimasee ainainiaqee qimasee aanoo irana faqa narirari mariana faqa taikaqa. Innee faqa maanara iriaqa, innee faqa inni ainainimariasasaa faqa moodaa rakisirafa innaarunai marifa, sia mifa ainainimariasara ureeqarausee qimasee kafa quandaki rakisi nimaqee mariasara uriqararausee qimasee qaara irirana maraidanoo, moodaa irirana marasee amana amana kai rakisi nimaqaidanoo.

Roomma maqannaa sundiara foora afaaqa ititamareena Sadannana faqa rakuuqa.

¹⁰ Maa ufana taikara ufa maaqimminoo maridanoo, innee karaambaiqa faqa maridaqa moodaanaki nimarifaqa mina firaa afeekannai inni faqa moodaanakikirana firaaqoo afeekaikamma mapukuqa.

¹¹ Sadannafa oosana oosana narí manda nikaru qiranannai inni naruannoo, innee minara rufiasee Anutufa niminna saqari duru saamunannai inneeqa nifaaqa ititaaqa.

¹² Maasa Yisuna ufa irimariasasaa sia faiqí faqa rakidaqa maasa meerai Anutuna innaaruna

ameemaanai maria manda afaanausa faqa raki-
daqa, maa asukunaki maria kamuqoo mirindari
rakimariasa faqa misa uriqararausa faqa misa
faiqi firaasa faqa meeraindari maasa daruafaqa
maasa misa faqa rakidaqa.

¹³ Innee minara iriseeqa Anutufa niminna duru
saamu saqarina qumareeqa deedaqida mariaqa.
Sadannafa mi manda faasaanna narirara ani-
rainaga innee amanaikiqa mariafanoo nari faqa
aruafaqaammasee miqoo kai eeraaramasee iti-
taqa mariaqa, sia amana ainnaaqaraani.

¹⁴ Minara qimannimidaqa. Innee findifi
deedaqida mariaqa Sadannafa inni mandoosana
nimisee naruandoora. Roomma maqannaa
sundia nifaaqa rafaqaqafimariana kikiqususee
inniara qianauroo. Inneeqa fausanda ni-
ranaqumuki rumbee maria fara foora mifa inni
anoona ufa kai qirafa mifa mariannoo. Inni
nimuqusasaa ititee maria afeeka ainainara foora
inni andeeqara oosana mariannoo.

¹⁵ Inni niku ititee mariafa niku aanaamuara
foora mifa Anutufa faqa mari asoora amiqira
fasaasa ufa maqee maqee aamina maqannaa
qimannimirafa mifa inni niku aanaamuara foora
ititarafa mariannoo. Mi andeeqara oosannausa
marasaifanoo Sadannafa sia amana inni naruani.

¹⁶ Inniqa saqari ukeeqirira fara foora Yisuna
saqarikirafa maridanoo. Innee Roomma maqan-
naa sundiara foora maqee maqee mi saqa-
rina ukeeqirisee maraqa nifanoo Sadannafa
nari feefa ida muquru qumaree inniara oosana
oosana furufarira irirana minannai inni nifaaqa
naqusee nariraree qimasee aqusainaqa innee

Yisuna saqarikiranannai mina mafi ruki aquaqa.

¹⁷ Roomma maqannaa sundiauqa rakiranaki fidaqa qafee nikiaqa afisusee nikiaga rukamifooraa afisimariqau. Inneeqa nikiaqaki ititee maria qafeenara foora Anutufa innaarunai asumu marirana nimufa maridanoo. Sadannafa inni kuridiranaki maqee maqee mara quqararinaqa innee mi qafeena afisusee asumu mari-aqa. Roomma maqannaa sundiauqa rakira paipana dinni dinni afaifaqaanannai faiqi atee-keeqa raquru nimiqa imariqau. Inni raiqara paipana aseema fooqaafa marina Anutuna ufa maridanoo mina maraquna fannoo mi ufana nimu ufafa maridanoo. Sadannafa inni faqa rakinaga mi samuna qumaree mina aruaqa.

¹⁸ Innee mi ainainausa maraidaqa innaaru qidaqa maqee maqee Anutuna dadaaqiranara faqa innaaru qiaqa. Anutuna maraquna afeekannai maqee maqee eendaki faqa faasaana faqa Anutuna maqasaa fasiqa anaaseera Anutufa amiqi amiqimma nimaqaanifeera innaaruqiaqa. Sia kudoosaapaaqa afeekaikamandee innaaruqiaqa.

¹⁹ Qini Pauroosara faqa innaaru qiaqa Anutufa oosana qimasainaqa qinee faiqi anaasee Yisunara qimannimianauree qimasee paasoosamandee qimannimianauree, Yisuna amiqira fasaasa ufa ooqai kukeeqanoo marifa maqee aukwana Anutufa faiqi anaasee kooroomannimaqeenoo.

²⁰ Qinee Pauroosa mi amiqira fasaasa ufana aanaiqikirausa maridaqa. Kuqaa Roomma maqanna karabusaki maridaqa kuqaa aanaiqikirausa maridaqa. Anutufa

qiniara paasosamandee faiqí anaasee qimannimiannee qifaqa innee qiniara innaaru qifaqa paasosamandee qimannimianauro.

Pauroona akara taikara akara.

²¹ Qinee Tikikusana aqíqaananoo qini daufakiana inni qimannimiannoo. Mifa maasa qimuqusi mari qíkaqaafasaafa maridanoo, karaambaiqa saikaki amiqí amiqira ainainimarifa maridanoo. Mifa qini fasaasa ufa inni qimanniminaqa innee qini mariranara iriaqeera.

²² Mina qimannimianifeera aqíqaanauro inni nimuqusa pooduqaanifeera aqíqaanauranoo.

²³ Maasa qíkoofa Anutufa faqa maasa karaambaiqa asauku mundirana Yisuna faqa naunduraki asoarana faqa nariara nariara uriqarara ainainee qimasee nimuqusirana faqa Yisuna saqarikirana faqa inni aiqama qini qíkaqaafasaauqa nimiani.

²⁴ Innee aiqamausa maasa karaambaiqa asauku mundirana Yisunara sia taikee maria rirana rimariasa, Anutuna afaarirafa inni faqa mariani.

**Fúka Moodaanaki Kira Ufa Afaqínaasa Ufa
Portions of the Holy Bible in the Binumarien
language of Papua New Guinea
Buk Baibel long tokples Binumarien long Niugini**

copyright © 1983, 2001, 2017 Wycliffe Bible Translators, Inc.

Language: Binumarien

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-08-10

PDF generated using Haiola and XeLaTeX on 18 Apr 2025 from source files dated 31 Aug 2023

4a891130-f25d-5e30-a81c-882b2e037698